

于役志 (宋) 欧阳修 撰

(四库全书集部别集类文忠集卷一百二十五)

景佑三年丙子歲五月九日丙戌希文出知饶州

戊子送希文饮于祥源之东园

壬辰安道贬筠州

甲午师鲁贬郢州

乙未安道东行不及送余与君颺追之不克还过君谩家遂召移之公期道滋景纯夜饮

丁酉与损之送师鲁于固子桥西兴教寺余留宿明日道卿损之公期君颺君谩武平源叔仲辉皆来会饮晚乃归余贬夷陵

己亥夜过邃卿家话别邃卿病也

庚子夜饮君颺家会期君谩武平秀才范镇道滋饮妇家不来

辛丑舟次宋门夜至公期家饮会者君谩君颺景纯穆之道滋饮妇家不来

壬寅出东水门泊舟不得岸水激舟横于河几败家人惊走登岸而避遂泊亭子下损之来奕棋饮酒暮乃归

癸卯君颺公期道滋先来登祥源东园之亭公期烹茶道滋鼓琴余与君颺奕已而君谩来景纯穆之武平源叔仲辉损之寿昌天休道卿皆来会饮君谩景纯穆之寿昌遂留宿明日子野始来君颺公期道滋复来子野还家余皆留宿君谩作诗道滋击方响穆之弹琴秀才韩杰居河上亦来会宿

乙巳晨兴与宿者别舟既行武平来追及至下鑿见之少顷乃去午次陈留登庾庙丙午在陈留

丁未次南京明日留守推官石介应天推官谢郛右军巡判官赵袞曹州观察推官蒋安石来小饮于河亭余疾不饮客皆醉以归

六月己酉次柳子

庚戌过宿州与张参约泊灵壁镇游损之园会余有客住宿州参先发棹灵壁待余不至乃行晚次灵壁独游损之园舟失水道败枻

辛亥次青阳

壬子至于泗州晚与国器小饮州廨中

癸丑始见春卿甲寅乙卯丙辰独在泗州始食淮鱼

丁巳次洪泽与刘春卿同年黄孝恭相遇始识大理寺丞李惇裕洪泽巡检颜怀玉者钱思公在洛时故吏遂与四人者夜饮五鼓罢明日食毕解舟与饮者别春卿复相送以前晚入沙河乘月夜行向小阳与春卿联句二鼓宿闸下黎明元均来遂至楚州泊舟西仓始见安道于舟中安道会饮于仓亭始食瓜出仓北门看雨与安道奕

庚申小饮舟中会者元均春卿安道余始饮酒移舟棹城西门门闭泛月以归

辛酉安道解舟不果别与春卿奕于仓亭晚别春卿壬戌与元均小饮仓北门舟中夜宿仓亭

癸亥夕与元均坐水次纳凉已而大风雨震雹暴至

乙丑与隐甫及高继隆焦宗庆小饮水陆院东亭看雨始见荷花

丙寅与元均隐甫饮于西仓

丁卯隐甫来会登仓北堰上亭纳凉迟客至遂及元均小饮舟中已而大风震雹遂宿舟中

戊辰余生日具酒为寿于舟中

己巳与元均泛舟北辰会隐甫小饮宿仓亭

庚午同年朱公绰来自京师

辛未子聪来自寿州夜饮仓亭留宿

壬申泛舟饮于

北辰癸酉隐甫来饮别夜与元均小饮宿仓亭

甲戌知州陈亚小饮魏公亭看荷花与者隐甫朱公绰晚移舟楚望亭陈从益来自京师见余于舟中始闻君谟动静秀才陈策来自京师夜见余于楚望亭作常州书自泊西仓至于楚望凡十有七日

乙亥次寶应

丙子至于高邮

七月丁丑复见子聪会饮弭节亭

戊寅遂与子聪同舟以前次邵伯

己卯至于扬州遇秀才廖倚夜与倚及子聪饮观风亭明日子聪之润州廖倚之楚州伯起来宿观风亭

辛巳与伯起饮溯渚亭会者集贤校理王君玉大理寺丞许元太常寺太祝唐诏祠部员外郎苏仪甫

壬午仪甫来小饮观风亭会者许元唐诏君玉伯起先归

癸未与许元小饮溯渚亭会者如壬午伯起不来

甲申与君玉饮寿宁寺寺本徐知诰故第李氏建国以为孝先寺太平兴国改今名寺甚宏壮画壁尤妙问老僧云周世宗入扬州时以为行宫尽朽漫之惟经藏院画玄奘取经一壁独在尤为絶笔叹息久之

乙酉小饮秀才吕有家会者如壬午伯起不来余遂留宿

丙戌至于真州大热无冰

辛卯饮僧于资福寺移舟溶溶亭处士谢去华援琴待凉以入客舟

戊戌入客舟泊涵虚亭

庚子次江口

辛丑次长芦  
壬寅夜乘风次清凉寺  
癸卯晨至江宁府  
八月丙午犹在江宁  
丁未小饮君绩家  
己酉小饮于水阁  
庚戌次采石  
辛亥阻风与侍禁陈宗颜饮  
壬子过太平州夜乘风宿带星口  
癸丑过芜湖繁昌宿慈母矶  
甲寅乘风昼夜行  
丙辰祷小姑山神至江州  
丁巳在江州约陈侍禁游庐山余病呼医者不果往遂行次郭家洲  
己未阻风郭家洲与沔阳县令赵师道饮村市就村人市羊供膳不得余疾谋还江  
州召庐山僧以医不果  
庚申次盘唐港  
辛酉至于蕲阳  
壬戌小饮瞿珣家会丹棱知县著作佐郎范佑蕲春主簿郭公美  
癸亥次新冶祷江神得大鱼  
甲子至于磁湖  
乙丑犹在磁湖自丁巳余体不佳至是小间丙寅至于黄州  
丁卯与知州夏屯田饮于竹楼兴国寺火约余明日为社饮不果夜登江澳次漆磁  
戊辰次双柳夹  
己巳次白杨夹  
庚午至于鄂州始与令狐修己相识  
辛未遣人之黄陂召家兄大风雨不克渡江而还  
壬申小饮修己家遂留宿明日家兄来见余于修己家始中酒睡兄家  
甲戌饮于兄家乙亥饮令狐家夜过兄家会宿  
九月丙子次河口  
丁丑次昭化港夜大风舟不得泊祷江神  
戊寅次穿石矶夜大风击舟不得寝  
己卯至岳州夷陵县吏来接泊城外  
庚辰假舟于邵暖  
辛巳壬午入官舟

癸未入荆江次李家洲甲申次乌沙

乙酉次鲁湫

丙戌次■〈土答〉子口观鱼望五鹅尘角望夫诸山

丁亥次石首夜大风

戊子阻风

壬辰次公安渡